

2. runda damas 30+ 3. ligia:

Schaan – Trun / 5:1

L' emprem' egliada ord finiesta empermeta in bi di da bial' aura, e quei per la secunda ga, tgei cletg. Plein curascha e perschuidadas da turnar cun in pèr puncts partin viers Schaan. Arrivai, anflein la finfinala ils plazs da tennis enamiez in bi uaul da caglias e pégnis. In bellezza areal cun sis plazs ed ina biala casa dil club cun ina gronda terrassa sasanfla leu.

Nossas adversarias han fatg a nus in cordial beinvegni ed han giu plascher da veser nus. Igl onn vargau vevan nus dau encunter la medema equipa a Trun. Ellas havevan pinau per nus bia bunas caussas ed han quintau che nus drovien bia vitaminas. Sin meisa eri pinau izuns, puaunas, schizun buontad farbuns ord la regiun dil lag Bodan. Suenter haver dustau las empremas queidas e gudiu in bien café ha ei giu num ir el cumbat. Nus havein entschiet tuts quater giugs el medem mument, aschia che nus havein buca propi saviu mirar ils giugs ina da l' outra. La Luisina, sco suleta, ha la finala giu da far il tgil plein cun ir dad in plaz a l' auter per motivar e dar sustegn.

L' Erna ha dau sco numera 1 encunter ina "giuvneta", fetg sperta sin comba. Suenter in dir cumbat havein stuiu schar leu quei punct. Sco numera 2 ha l' Aurelia dau. Ella ha buc fatg liungas e gudignau siu giug suveranamein. La Gaby sco numera 3 ha era stui schar ad ellas il punct. Moviment, moviment, vess il Gion detg. La Petra ha dau siu emprem giug singul sco numera 4. Plein curascha e senza propi saver tgei che spetgi sin ella, ei ella ida sil plaz. L' entschatta ei dada, e nus essan perschuidadas ch' ei va buc ditg tochen ch' ella raccolta per nus ils emprems puncts. Ils dubels han l' Aurelia e l' Erna (1) e la Luisina e la Petra (2) dau. Ellas han empruau sin tuttas modas da prender lur adversarias ord il giug e dad ir giud il plaz cun ina victoria. La finala ha ei lu era dau cheu dus puncts per l' equipa da Schaan.

Suenter ils giugs han nossas adversarias dumandau sche nus lessien star a tscheina. Nus havein mirau curios e surstadas da quella damonda ina sin l' outra. Mo cun in punct eran nus propi buc cuntentas, ina buna tscheina eran nus dil meini che nus hagian fadegiau.

Aschia havein gudiu l' emperneivla sera da primavera, il bien apéro e la buna spaghetatta sin la terassa. Suenter il café essan semessas sin via encunter casa. Tochen tier il parcadi havein aunc stuiu ir in pèr minutas a pei. Leu spitgava in botsch sin nus. El haveva schau scapar sias cauras, ni forsa era era el scappaus. El ha scadin cass giu plascher da veser tontas bialas dunnas ed ei fageva la pareta sco sch' el vulessi vegnir ensi cun nus.

Nossa chauffeusa Erna ha menau nus puspei segiramein a Trun. Ella ha mess si in record da temps. Exact 60 minutas havein giu, schegie che tenor "google" havess il viadi cuzzau 67 minutas. Il castitg ei lu era gest arrivaus. Buc ord igl auto, ch' ella ha giu in crampf ella comba. Sperond sin pli bia puncts l' outra ga, serendin tuttas a casa.